

XVIII INTERNACIONALNI FESTIVAL PRIJATELJSTVA OD PRVOG DO ŠESTOG AVGUSTA

Već sedamnaest godina traje lijepa priča u kojoj su svoje mjesto našli brojni umjetnici iz cijelog svijeta, dobri i dragi ljudi kojima su Goražde i njegovi stanovnici u srcu. Priča čiji je naslov smješten u tri riječi: Internacionalni festival prijateljstva, po mnogo čemu jedinstvena kulturna manifestacija u regionu.

Priča koja svoj nastavak ima i ove godine, od prvog do šestog avgusta. U šest dana ove prestižne manifestacije u Goraždu će se susresti umjetnici – prijatelji iz niza zemalja. Pomenimo samo neke: Francuska, Turska, Bugarska, Srbija, Njemačka...

Posjetioci Festivala imaju priliku da vide promocije knjiga i sajam knjige, igrane i dokumentarne filmove, da uživaju u koncertima pop-rok i narodne muzike, koncertima kulturno umjetničkih društava... Osobito vrijedni segment Festivala je i ove godine međunarodna likovna kolonija „Boje prijateljstva“ a u Festival se vraća i manifestacija koja posebno raduje mlade. Riječ je i Igrama na Žanju, adi na Drini, u srcu Goražda, tokom kojih će se djevojke i mladići nadmetati u fudbalu i odbojci na pijesku, te drugim disciplinama, naravno uz dobru zabavu.

U Festivalskom programu je i „Sajam starih zanata“ koji čuva tradiciju ručnog stvaranja i promoviše turističke i gastronomske potencijale Goražda i Bosansko podrinjskog kantona. Za najmlađe su pripremljene brojne edukativne i zabavne radionice, a njihova festivalska priča biće zaokružena velikim, tradicionalnim maskembalom. Duh Festivala i iskrenog prijateljstva između Goražda i Bretanje, grada San Brijea donose sa sobom članice i članovi ansambla Le ZaZu (Les ZaZous) koji su već nekoliko puta učestvovali na goraždanskom festivalu.

Pokrovitelj i organizator manifestacije Općina Goražde i Centar za kulturu privode kraju posljednje pripreme za XVIII Internacionalni festival, šaljući u svijet poruke mira i dobrodošlice građanki i građana Goražda.

**Press služba XVIII Internacionalnog festivala prijateljstva
Goražde 2015.**